

Headline	Bantu golongan pertengahan		
MediaTitle	Kosmo		
Date	23 Oct 2013	Language	Malay
Circulation	115,967	Readership	406,000
Section	Negara	Color	Full Color
Page No	3	ArticleSize	193 cm ²
AdValue	RM 1,678	PR Value	RM 5,034



Bantu golongan pertengahan

Bajet 2014 perlu mengatasi masalah kesukaran membeli rumah

NOR SHAFAWATI YUP

KUALA LUMPUR – Bajet 2014 diharapkan lebih memihak kepada golongan pertengahan yang sebelum ini kurang mendapat tempat dalam Bajet 2013 dari segi mengurangkan bebanan kos hidup.

Penganalisis ekonomi yang juga Pensyarah Fakulti Ekonomi, Kewangan dan Perbankan, Universiti Utara Malaysia, Prof. Datuk Dr. Amir Hussin Baharuddin (**gambar**) berkata, antara yang boleh dipertimbangkan dalam bajet kali ini ialah pengurangan cukai pendapatan individu dan memberi kemudahan untuk memiliki rumah mampu milik.

“Golongan pertengahan merupakan penggerak utama ekonomi negara, oleh itu kebajikan mereka tidak wajar diabaikan.

“Sehingga kini golongan pertengahan masih belum menerima apa-apa manfaat daripada pelbagai dasar kerajaan berbanding kelas

bawahan,” katanya ketika dihubungi di sini semalam.

Golongan pertengahan merujuk kepada mereka yang mempunyai pendapatan antara RM2,300 hingga RM7,000 sebulan.

Beliau berkata, golongan bawahhan misalnya dijangka akan tetap menerima Bantuan Rakyat 1Malaysia (BR1M) dengan jumlah yang akan diumumkan dalam Bajet 2014 pada Jumaat ini.

“Menjelang Bajet 2014, kerajaan perlu menyasarkan bantuan kepada golongan yang tepat (bawahan dan pertengahan) berbanding golongan yang tidak layak menerimanya seperti orang kaya dan warga asing,” katanya.

Beliau berkata, sebagai contoh pemberian subsidi perlu dikaji semula dan dihadkan kepada warganegara yang layak menerima.

“Subsidi barang kawalan seperti gula dan minyak perlu dipantau

oleh kerajaan supaya golongan yang tidak layak termasuk warga asing tidak menerima faedah yang sama,” katanya lagi.

Dalam pada itu, tambah beliau, keutamaan dari segi kemudahan pembelian rumah menerusi Skim Rumah Mampu Milik wajar diperluaskan kepada golongan pertengahan.

“Kerajaan juga perlu serius dalam urusan pengawalan harga rumah yang dilihat semakin meningkat, walaupun pinjaman rumah telah disediakan, namun ia masih di luar kemampuan golongan muda,” katanya.

